

黃岡縣志卷之九

知黃岡縣事宛平俞昌烈編輯

人物志

宦蹟

莊周曰絕迹易無行地難此貴虛之說豈可語於宦途夫宦必有理理必有蹟大則雷雨經綸細則簿書鞅掌入則論思密勿出則經營四方爲其事而無功無名吾未之見也邑紳之特著者若而人類皆奮其才猷勤其職業以各表見於一時旂常俎豆筆袞口碑不亦媿乎

陳

黃岡縣志

卷之九

宦蹟

一

周炁字文昭本汝南安成人祖疆齊太子舍人梁州刺史父靈起梁通直散騎常侍廬桂二州刺史保城縣侯自靈起先世避西晉亂徙居黃岡遂爲永安周氏炁少豪俠任氣有將帥才梁西陽太守封西陵縣伯討侯景有功進爵爲侯陳高祖代梁炁與王琳起兵伐之爲陳將侯安都所敗擒炁送都世祖釋之授戎威將軍定州刺史帶西陽武昌二郡太守進都督安蘄江衡司定六州諸軍事改封龍源縣侯會炁入朝定州刺史田龍升以江北六州七鎮叛入於齊炁討斬之盡復江北之地進號平北將軍定州刺史卒官贈武昌郡公諡曰壯子法

僧法尚詳陳書

隋

周法尚字德邁少果勁有風概好讀兵書爲陳始興王中兵參軍其父卒後監定州事督父本兵數有戰功遷使持節正義將軍散騎常侍領齊昌郡事封山陰縣侯以其兄武昌縣公法僧代爲定州刺史法尚與長沙王叔堅不相能叔堅譖其將反法尚懼歸於周宣帝甚優寵之封歸義縣公隋高祖受禪拜巴州刺史破三鷓叛蠻於鐵山轉黃州總管尋遷永州總管安集嶺南仍給黃州兵三千五百人爲帳內嶺南州郡多降其後屢討平

黃岡縣志

卷之九

宦蹟

二

叛蠻賞賚優渥煬帝嗣位轉雲州刺史金紫光祿大夫後爲滄海太守討羣盜王薄孟讓等卒於軍贈武衛大將軍長子紹基靈壽令少子紹範最知名詳隋書

唐

周墀字德升炅五世孫少孤事母孝及進士第官集賢殿學士長史屬詞高古文宗雅重之李宗閔鎮山南表爲行軍司馬閱歲召還太和末李訓鄭注亂政以黨語誣縉紳竄逐之墀雖爲宗閔所禮不能以罪誣也武宗卽位拜義成節度使封汝南縣男宿將暴警不循令者墀令鞭其背一軍大治進同中書門下平章事宣宗時河

東節度使王宰重賂權幸求同平章事領宣武墀言天下大鎮如并汴者纔幾宰之求何可厭帝納之駙馬都尉韋讓求爲京兆持不與由是妄進者少衰會議河湟事墀對不合旨罷爲劍南節度使駙馬都尉鄭顥言於帝曰世謂墀以直言相亦以直言免帝悟加拜檢校尚書右僕射卒贈司徒詳唐書祀鄉賢

宋

王揆字孔度泰和六年任虔化令築子城濬濠池建廨舍創始之功居多詳贛州名宦志

元

黃岡縣志

卷之九

宦蹟

三

冷庸字用和至正間任西臺御史有風裁祀鄉賢

明

詹同字同文舊名書婺源人元至正中舉茂才異等授郴州路學正避亂黃州因家焉陳友諒徵爲學士承旨明太祖下武昌召授國子博士易名同尋遷考功郎中直起居注會議袷褹禮議當遂用之累遷侍讀學士時劉基以用法過峻請加禮大臣同因取戴記及賈誼疏以進開說愷切進吏部尚書與陶凱作宴享九奏又與樂韶鳳定釋奠樂章又與宋濂倣唐貞觀政要分輯政績爲寶訓五卷後賜敕致仕語極褒美久之起承旨卒祀

鄉賢同以文章顯而操行耿介故眷注至老不衰子徽字資善任都御史持憲有聲大誥嘉美之後誣藍黨死孫紱尚寶丞從孫希原中書舍人善大書時宮殿城門題額皆希原筆同徽希原俱祀鄉賢詳明史

吳琳字朝陽父應澍詳隱逸傳琳性純篤力學明太祖徵用荆楚名儒詹同薦琳博學能文召爲國子博士與同竝教胄子同才藻過琳至商摧經義亶亶不窮同自遜不及也洪武元年除浙江按察司僉事復入爲起居注齎纁帛求書四方六年晉兵部尚書改吏部尚書量材授官號爲得人以老致仕歸久之帝遣使察之使者潛

至舍傍見一農人坐小机起拔稻苗布田貌甚端謹使者前曰此間有吳尚書在否農人斂手曰琳是也還白帝爲嘉歎詳明史卒祀鄉賢弟琛字文錫少好學與兄齊名官衢州府同知盡心奉法政多偉績

黃榮機警有謀明初從定江淮平中原有功授和陽衛指揮洪武三年從傅友德伐蜀克成都又從征保寧留榮駐守已論平蜀功賜金幣還鎮黃州修城濬濠招懷降附民甚賴之卒祀鄉賢

徐便嗜學有武畧洪武時以精兵從葉旺征討有功陞海州衛指揮僉事復陞遼東都指揮僉事詳見盛京通志

韋富從太祖征伐有功陞指揮同知調金州衛宣布恩信頗著勞績載盛京通志

徐本性倜儻嫻文辭洪武初由薦舉知嘉興縣重農勸耕賑養貧乏擢平陽知府荒殘後建置一新詳山西名宦

志累官廣東布政使卒祀鄉賢舊志今依明史改定

黃爽洪武初知衢州府芟草萊以營府治增城堡以撫流亡振文教興水利頑民嘯聚親入其壘擒縱得宜開衢之功爲最祀清節祠載浙江名宦志

陳敬洪武初由歲貢授龍川知縣時盜起爲患民不聊生都司官將興師敬與邑人謀請爲先圖密遣人誘其首

黃岡縣志

卷之九

宦蹟

五

擒之不費升糧不損一卒民賴以安載惠州名宦志官至刑部員外郎

李本中洪武中由薦舉授通許知縣清謹公平驗丁編徭吏胥縮手貧民無耕具者貸之使不失業許人咸頌其德載河南名宦志

蕭昇字彥高永樂丙戌進士拜監察御史九載上疏省親賜敕褒之給其路費中允王愷贈之文曰禮以律身明以折獄皂囊曉進臺閣生風白簡夕飛奸回落膽其見重於朝如此卒祀鄉賢

張璘字文玉本姓周宋工部尚書周有操裔也自璘曾祖

原昇遷黃蒙張姓璘魁梧異常永樂壬辰進士累官山東參政宣德二年調福建考最擢應天府尹璘廉幹所至有治聲嚴正自守摧抑中貴雖讒說不能沮卒於官祀鄉賢詳明獻徵錄

方正永樂戊戌進士宣德間知河南考城縣寬刑薄賦守法奉公得爲政之體載河南名宦志

王璘字廷玉先世以武功顯父景字時亨永樂間襲榆林千戶英宗北狩擁護有功復辟時已卒賜之祭葬璘登成化丁未進士宏治中累官廣西右參政時思恩土官岑濬叛朝議用兵誅勦分六哨璘與副總兵毛倫由慶

黃岡縣志

卷之九

宦蹟

六

遠入抵其巢思恩平璽書褒勞事見明史

劉以文字彥章永樂間温州府照磨以廉能聞擢陽城知縣有治績澤州名宦傳稱其明於治體不矯飾爲廉不姑息爲惠九載民乞留進秩二級又九載治行優優化治於民致仕去民慕之建祠以祀御史李經爲之記比歿有耆庶數十人弔於家正統中有劉以德由人材任知府進階亞中大夫亦有治聲俱祀鄉賢

謝泉字伯明父希哲性凝重工書畫由人材爲泰興丞長垣知縣以幹濟顯泉登正統戊辰進士授戶部主事景泰中都督黃竑得幸奏求霸州武清地泉承命往勘還

奏地實民產請罪竝天順三年由監察御史出知九江府蒞任公勤撫民惠愛載九江名宦志以憂去後起江西副使累官四川參政布政使所至得民以清慎稱晉副都御史巡撫貴州平鎮溪篁子坪蠻有功見明史後致政歸卒諭祭葬贈太子賓客祀鄉賢

王思旻有幹才起家薦辟內廉行修正統間判泰州泰故多牧地孳馬民間思旻爲奏罷三之二復苦水患請部使者蠲租六萬石挽舟哀訴投水以白民災使者大驚爲請獲免又造廣運望江二橋置預備倉八十間秩滿當去民乞留遷本州同知德政益勵後歸老於家泰民

黃岡縣志

卷之九

宦蹟

七

祠祀之見明史循吏傳卒祀鄉賢

王琳正統二年由監生知雩都縣親賢愛士矜恤民瘼邑舊苦差徭農民不諳水石皆驅供別郡夫船之役琳入覲奏其狀及諸邑皆免之以憂去百姓送者咸泣下祀名宦祠見雩都志

鄒璽成化甲午舉人授四川榮昌知縣邑值兵荒極意蘇息作饘粥以活饑民視獄冤抑及罪輕者咸出之見重

慶名宦志

張佐字良弼成化辛丑進士有介行授彌勒知州政平訟息平十八寨運籌有功民不知擾累官按察僉事免歸

饘粥不繼晏如也詳雲南名宦志祀鄉賢

王麟字體仁宏治己未進士操履端潔重然諾授封邱知縣勸農桑鋤強梗一境大治嘗途中見百餘人舉大木爲耶許歌有蒼頭乘馬鞭之間之則曰馬太宰治宅麟執蒼頭撻之比入覲天下計吏庭謁尚書卽向時所稱馬太宰也起席曰賢哉封邱令能愛其民因下揖時兩賢之卒祀鄉賢子廷梅嘉靖癸未進士官知府廷槐別有傳

陳廷瓚字汝忠宏治辛酉舉人授沈邱知縣擢彰德通判清謹有惠政遇歲祲賑濟有方民賴以全活者甚眾祀

黃岡縣志

卷之九

宦蹟

八

鄉賢見府舊志

張濟字三峰本姓周宏治甲子舉人知嵩及清河二縣以氣節稱解組歸閉戶自怡同里王廷陳贈以詩曰自遂歸田卧何曾入郭行比鄰稀識面州郡祇知名其風概如此卒祀鄉賢

江淵字世用永樂時流寓蜀之江津宣德五年選庶吉士後以學士入文淵閣官至工部尚書詳明史蜀志云清勤簡靜忠鯁不阿文事武備功業兼懋善文詞所著有觀光錦榮諸集子孟綸官御史

曹珪字廷獻正德辛未進士授桐廬知縣時屢年大旱又

江西盜起邊軍南下經畫周緻事濟而民不擾又以其暇修葺廟學載嚴州名宦志改海寧召拜御史按廣西平徭獐有功再按陝西時武宗遣中官過陝者珪遮留疏諫輒得寢累官有餘俸不置私產悉與異母弟共之著有南坡奏議祀鄉賢曾孫士彥別有傳

賈啓字啓之正德辛未進士授涇縣知縣爲政嚴明事至卽決民有官清吏廢之謠載寧國名宦志徵拜侍御擢光祿少卿尋謫徽州推官累遷副都御史巡撫延綏啓博學多才藝善天文慷慨談兵事甚覈所至有治聲及致政家居二十年恬約不殊布素鄉人稱爲篤行君子

黃岡縣志

卷之九

宦蹟

九

祀鄉賢

王廷儒號七澤父濟載孝友傳廷儒正德丙子舉人由都察院都事轉四川按察司僉事左遷成都府漢州判官攝理綿竹性公直一介不取撫恤窮民加意學校士民德之載成都名宦志及歸立家廟如禮子弟有不謹者責於廟以孝友爲家法先是濟生子五廷儒前妻子也繼室徐生廷瞻方幼有羣盜至索金露刃將加於廷儒徐氏抱幼子請代盜義而去之其後廷儒撫諸弟極友愛至老不衰

張澤字龍山本姓周父歧篤志慕古絕意科目楊慎所銘

萬松處士也澤嘉靖乙酉舉於鄉授商水教諭主大梁書院以薦預廷試疏陳時事遷雲南歸化知縣改廣東河源未行復改蒙自蒙自當安南之衝時方用兵撫按以澤才交疏留之澤不避險阻招撫輯安果有功將議甄錄乞養歸與吳良吉講學布袍芒履不治生產卒祀鄉賢孫啓孫博學篤行學者宗之以明經官平度州同知亦祀鄉賢曾孫之訓見忠義傳

萬民望號樊江子嘉靖乙酉舉人有孝稱文學豐贍操履端潔教諭新野教士誠懇惟恐不至於成又請修新野名宦鄉賢之祀應南畿同考聘校士稱最遷寧州知州

黃岡縣志

卷之九

宦蹟

十

士民攀轅遮道詳新野名宦志著有鳴蛩集

曹誥字廷寵嘉靖丙戌進士授瑞安縣知縣適山寇犯平陽境藩臬會勦駐邑中誥調度有方事集而民不擾值歲歉審貧困者刻期賑之惠及遐陬治邑六年革奸胥懾豪右疏通水利具有政績詳浙江名宦志擢禮部主事出知安慶府以清慎稱調寧波晉四川按察副使累官甘肅巡撫卒於任

陶珪字廷獻嘉靖丙戌進士授戶部員外郎督鈔臨清累官山西按察使所至稱爲廉明事繼母以孝聞餘俸分給諸孤從子家無私積性端介不附權勢著有雪堂集

又善擘窠大書邑里重之祀鄉賢

邱峻早負奇氣以歲貢除灌縣訓導持身嚴矩矱蜀人士爭齮礪焉

閔泰字文亨歲貢性慈和知梁山縣字民如子及去民有閔母之思云

陳言字秉忠仁慈謙讓口不言人過以歲貢擢慶陽府通判嘗督邊餉捐俸以助軍民立祠祀之歸老二十餘年不履公庭歲鄉飲賓聘至再始出其爲有司嚴重如此卒祀鄉賢

陳萬卷字德備以吏員授安平尉值白蓮賊謀襲城萬卷

白令督捕擣其穴三戰皆捷賊魁就縛撫按上其功賜金帛擢永平通判丁艱歸卒於家安平人立廟祀之汪文淵字赤崖嘉靖己丑進士選庶吉士改戶部郎中出知金華府清正剛明不畏強禦時嚴嵩擅權其僕怙勢橫甚文淵捕遣之忤嵩媒孽無所得乃免官歸金華人祀之

王鳳陽字梧岡定遠侯弼之裔也弼子誠孫貴遷黃岡爲世族鳳陽少穎敏苦學嘉靖辛卯舉於鄉知四川萬縣時土苗作亂練鄉勇勦撫有功撫按交薦尋以疾乞歸講學著書耄年不倦卒年七十餘崇祀鄉賢子睦址俱

舉人從孫欽濂南陵知縣別有傳

按舊志王弼有傳
今依附

志附見王
鳳陽傳內

董德明嘉靖壬辰進士授戶部主事督九江鈔關遷知處州府周恤民隱府縣常例釐革悉盡胸次洞達四境安其治載浙江名宦志五載擢山東兵備副使官終河南右參政

方任字志伊嘉靖壬辰進士由行人擢刑科給事中以釐直忤權貴改兵部主事遷員外郎出爲四川僉事江西參議副使所在以廉幹稱遷山東參政督蘇松糧餉力清積逋晉浙江按察司尋轉江西右布政以母病告歸

黃岡縣志

卷之九

宦蹟

十二

終養卽苦次拜副都御史巡撫應天不起父勇性素方嚴任每事必先意承歡其孝友馴行爲鄉評推重俱祀鄉賢

劉珙字商陳嘉靖庚子舉人性孝友立身剛直足不入公府除黃縣知縣時宦豪肆勢珙摧鋤無所避海賊臨城縱掠悉力拒之遷知寧羌州有仇夜殺七人索屍不得珙焚香告天雷發其屍冤遂雪仕宦不置生產居鄉以公亮稱子功允別有傳

周之冕字元服嘉靖庚子舉人授餘杭知縣勸農桑勤教化凡案牘悉置密室吏胥無所售姦催科能調緩急見

孝弟節義者必崇獎之詳杭州名宦志

邱岳字南正父尚忠見篤行傳岳成嘉靖丁未進士擢工科左給事中時伊藩典楨貪愎僭侈岳上言其罪得勘定削伊世封直聲隆諫垣見明史累官禮部右侍郎遇事敏達勵操清素每誠其家不得與公事致仕後奉詔存問者再鴻文淵學典冊多出其手卒祀鄉賢

程鳳金嘉靖己酉舉人授彭澤知縣多善政獄無冤滯庭無私謁景王道彭澤不加派而供億傳厨如額有廉能聲值御史按部鳳金後至忤御史意出曰御史所以有權者能去人之官也吾官自去御史何權遂解綬歸御

黃岡縣志

卷之九

宦蹟

十三

史悔追之不復邑人思而祠之詳九江名宦志

陳仕字又愚嘉靖壬子舉人除弋陽知縣時閩浙倭警客兵騷動仕撫循既定請建縣城賴以保障詳廣信名宦志遷嘉興府通判從司馬胡宗憲破倭賊有功晉本州同知以母老乞歸布衣蔬食授徒自給與兩弟友愛弟化歲次當得貢子九疇在其先仕使九疇稱疾讓之弟遂得先貢

杜傑字汝英嘉靖戊午舉人授長寧知縣值歲歉賑活甚衆時九絲初定黠酋內訌拮据調劑卓有政績後采木山中值水涸露禱雨注木乃出先是西南蠻騷動議討

傑力陳不可當事弗聽卒至於敗人服其識詳叙州名
宦志昆季六友愛罔間及歸敝衣麤食陶然自得也卒
祀鄉賢子應芳別有傳

王廷瞻字稚表嘉靖己未進士授淮安推官入爲御史督
畿輔屯政裕邸欲易莊田廷瞻不可隆慶元年所部久
雨請自三宮以下及裕府莊田改入乾清宮者悉蠲其
租詔減十之五已言勲戚莊田太濫請於初給時裁量
田數限其世次爵絕歸官制可高拱再輔政廷瞻嘗論
拱遂引疾歸神宗立起故官累太僕卿五年以右僉都
御史巡撫四川時番屢犯松潘廷瞻令副使楊一桂總

兵官劉顯勦之殲其魁於是風村白草諸番二十八砦
率男婦八千餘人降復討建昌傀厦洗馬始宰鐵口諸
叛番皆降增俸一級進右副都御史撫南贛入爲南京
大理卿累遷兩京戶部左右侍郎以右都御史出督漕
運兼巡撫鳳陽諸府寶應汜光湖堤蓄水濟運平江伯
陳瑄所築也壅決爲患諸鹽場皆沒廷瞻承前巡撫李
世達等開越河避險之議鑿渠千七百七十六丈爲石
閘三減水閘二石堤子堤各數千丈發公帑二十餘萬
八月竣事詔旨褒嘉錫河名曰宏濟進戶部尚書巡撫
如故尋改南京刑部尚書乞歸卒贈太子少保賜祭葬

詳明史祀鄉賢

李植字良材少聰穎善屬文嘉靖辛酉舉人除萬縣知縣折獄明決時爲之語曰勿歧舌見必屈杜若唇冤必伸有無賴子殺七人而匿久索不獲植禱於神夢得殺人者迹而縛之有僧殺人隱其屍二十年矣植從容諭僧得其狀遂伏罪鄰邑皆呼神尹詳四川名宦志後考最徵拜御史請省壽陵費帝嘉納之以抗直出爲福建僉事爬搜宿垢風教一新尋乞假治喪卒於家大司寇王世貞志其墓祀鄉賢

王同道字純甫嘉靖壬戌進士授蘇州推官擢御史謫內

黃岡縣志

卷之九

宦蹟

十五

江知縣調停里甲訓迪人材蘊藉風流古文詞賦咸有逸氣詳資州名宦志

成敏貫舉人嘉靖末授新寧知縣值歲歉發倉施粥又革日支驛馬以寬征役南岸土酋用兵芻輓迭出邑不告罷比歸惟圖書數卷黃元白作去思碑謂其廉與誠合不與俗偶洵清白吏也詳四川名宦志

袁文伯字綱齋性至孝愛慕如孺子嘉靖甲子舉人除潛山知縣崇孝友興文學三年政簡民和土風大振會歲大饑有院使過其地供億不備使者慍呼之曰汝讀書不知柔遠人乎答曰當此凶歲惟有子庶民而已解綬

歸養親不懈者三十餘年太守楊節高其行登其堂迓
爲鄉飲賓者五號曰孺慕先生有詩集十卷行世子希
變見隱逸傳

范芝字德和性孝友父病三年日侍湯藥未嘗去左右及
父卒哀泣成羸疾醫療數年乃起兄及姊子貧不能自
立推產贍之有雋才篤學博聞從遊甚衆嘉靖間以選
貢授定遠知縣甄善除惡招撫流亡捐俸備賑邑稱大
治事載定遠名宦志以母老歸養著有三秀集卒祀鄉
賢

劉功允字順廷珙子隆慶丁卯舉人授懷遠知縣遷温州

黃岡縣志

卷之九

宦蹟

十六

府同知剖決簿書人稱神明贖鍰不入私帑悉以賑貧
士修學宮整飭海防民賴以安載浙江名宦志改汝寧
宦况清苦如舊子宗祥別有傳宗祺萬曆乙卯副榜博
學饒才畧崇禎初舉賢良授重慶知府辭不赴

邱一竒隆慶丁卯舉人官池州府同知舊志稱其家無私
橐討倭寇有轉餉功

汪守廉字克辨祖大章有隱德歲凶出穀千石貸里中不
責償守廉性孝友負介節隆慶丁卯舉人以甲戌會副
授彭澤教諭興學勸士分丙子應天試得士多以清直
顯遷雙流知縣察冤獄清隱賦人稱神明擢知威州民

有疾苦身若痾瘵士民愛慕苗獠傾服詳茂州名宦志
遷曲靖同知以清白聞璽書賜金褒之值艱歸家無長
物子傑選貢臨洮通判亦祀名宦孫國滌見隱逸傳
易倣之字惟倣隆慶戊辰進士授行人擢戶部員外郎督
臨清倉遷知衢州府務以德化訟獄衰息又邑苦遠輸
倣之均田賦量遠近簽米多者爲正戶督解事少者附
給路費民免困累詳浙江名宦志遷四川涪州道以招
諭楊應龍功晉叅政丁艱歸居家醇謹篤誼卒祀鄉賢
涂巍隆慶庚午舉人累官廉州知府敦大不苛片言決訟
十餘年未嘗斃一人攝理四川所至有聲載廣東名宦

黃岡縣志

卷之九

宦蹟

十七

志

汪一右隆慶庚午舉人累官泗州知州時總河潘季馴請
加泗城護堤命一右董其役自新橋口亘西門坊至迤
南諸處增石堤長二千餘丈高於舊二尺又建子堤千
六百八十丈凡二年畢工泗水得以無患泗人祀之名
宦祠事見明世法錄

杜伸字冲宇鳴陽子隆慶辛未進士除華亭知縣繼補大
足擢知南安府所至以清直稱晉松潘兵備道一身萬
里捍禦邊陲苗蠻屏息民慶安堵以勤事卒於官巡撫
喬維新爲治喪發其篋敝衣數襲而已事聞贈太僕寺

少卿賜祭葬仲居家孝友子無私藏嘗置公田三百畝以贍給族屬子桂芳副榜連雲凌雲俱諸生凌雲字爾青性至孝值母喪七日流賊猝至人盡奔散凌雲獨撫棺而哭曰無傷我母棺賊感其孝釋之

江沛然字應吾隆慶辛未進士知吉水俗多溺女沛然嚴禁之報最擢淮慶推官又江南名宦志載沛然署廬州事積弊之後力爲振刷廉渠奸置之法一境肅清海忠介瑞亟稱之後遷南戶部郎罷歸

曹士彥字孟彥父美嘉靖末舉人力學篤友誼淡於仕進士彥事繼母以孝聞萬曆己卯舉於鄉除定遠知縣清

黃岡縣志

卷之九

宦蹟

十八

正自飭勵學勸農興滯搜奸民有不若訓者歛諭之及卒邑人張御史一鯤斂金治其喪去之日號哭送者數千人立祠祀之士人禱祈輒應載定遠名宦志

郭知易字如紀慶之孫萬曆己卯舉人授中江知縣治才明敏有廉平聲擢工部主事時方建兩宮御史議簽人夫運石如嘉靖故事知易上議造車法所費視舊僅十六之一官儲無損而民不擾其幹濟類如此遷員外郎告歸囊無餘物耿定向稱其世濟清白云子世完諸生舉異才參謀都司孫都城舉人咸寧教諭

王一鳴字伯固齠而能文潛心諸史百家言試童子輒第

一一時目爲神童弱冠舉萬曆壬午鄉試丙戌成進士
與同年謁政府王錫爵揖之曰子天下才也授太湖令
會歲大札賊起西鄙一鳴力請罷數年逋賦當事初難
之卒如其請又請太府金五百給民易種植遣人從淮
揚市麥發廣儲倉義倉穀親爲糜粥所活者萬餘人乃
單騎行隴上召野老語如家人由是耕織復業時大盜
劉汝國初平招徠流民數千築翟公堤無憂堰范園壩
歲漑田數千頃利及後世後改臨漳承凋敝後加意撫
字長吏重之凡有著撰悉屬焉會修國史大學士趙志
臯薦有詔徵用未行卒於官著有朱陵洞稿四十卷祀

黃岡縣志

卷之九

宦蹟

十九

鄉賢子封東諸生

洪聲遠字四極萬曆辛卯舉人授山西高平知縣歲大旱
飛蝗蔽天聲遠禱天暴日中雨降蝗盡死歲登遠近異
之擢戶部主事出爲貴陽知府時土司安邦彥圍貴陽
聲遠禦之大小數十戰外援不至聲遠激勸士卒誓以
身殉人皆感勵無叛志圍旣解以功擢新鎮道監軍副
使接物寬和民皆愛戴見貴州名宦志晉雲南叅政以
年老乞歸居鄉力行善事設義塚拯溺屍人咸德之從
子有臨甫一歲孤撫猶己子以恩貢授夾山知縣子有
執諸生有守舉人博學能詩古文兼以書畫名

何天申字德錫萬曆辛卯舉人授廬州判三載召判順天
時乾清宮災珍寶幾盡欲按籍召商買補之天申抗論
明主不貴異物今珍寶價凡千一百四十萬有竒取之
太倉則不足取之加派則厲民惟宜加意修省以回天
變疏入落三級補無爲州判築鱖魚壩二十里數歲始
成民賴其利移判鳳陽致仕歸卒

胡恩字前江黃州衛指揮督運漕艘輒報最累遷瀘州叅
將移鎮松潘諸土司長官例奉金幣恩一切擯斥威令
大布三載進秩總兵

樊玉衝字元之父煒載儒林傳玉衝事親以孝聞性淡泊

無所苟萬曆乙未進士授商城知縣商故徵賦保伍與
胥役爲奸又縣拘囚者例用馬快所至家輒破玉衝悉
罷之遂按誅豪蠹民得休息教以孝弟廉讓行之期年
訟獄衰息會中使採礦至商玉衝宣言無礦與之抗因
導入險爲文告山靈曰有礦當吐符陳貢不然而令與
璫藉口括金以爲民患神其殛之璫怏怏去其後治崑
山有織造中璫擾民治之亦如商玉衝初至崑山曰邑
繁劇當臨以簡是秋雨傷稼駕小艇巡視村落與饑民
相對噉菜粥民皆感泣詳江南名宦志在崑六年邑大
治去之日敝篋一肩而已是時方推吏部文選司聞父

病乞歸養歲餘以勞瘁卒商崑民祠祀之崇禎初勅建祠諡孝介祀鄉賢

孫大壯字心易生有雋才勵志讀書萬曆乙未進士累遷福州知府治行清簡一時推爲循吏擢江西右叅政官終陝西苑馬卿所著詩文公安袁宏道推重之

周蓋臣萬曆丁酉舉人授石泉知縣清操有惠政民懷思之載四川名宦志

穆天顏字象懸事親以孝聞家貧力學有雋才萬曆戊戌進士授番禺知縣舉最拜福建道御史劾稅監及諸權貴請省刑蠲賦薦正人諸疏多所建白時疏多留中而

天顏奏輒議行累遷巡按廣西節操風裁爲一時人表以內艱歸不置產業所餘俸召族戚及故交貧子弟分之微時區豆之惠罔不報也初父守文教諭四川卒於官天顏方少與兄扶櫬走萬嶺中資糧且盡逆旅不納會大雷雨昏黑哀號逐電光行或感其孝厚贈焉至是厚報之卒祀鄉賢

官應震字暘谷如臯子萬曆戊戌進士授南陽知縣再補濉縣舉最擢戶科給事九年前後二百餘疏皆救時碩畫神宗嘗以敢言稱之光宗卽位遷太常少卿尋乞歸天啓間屢召以魏璫用事不起卒年六十有八崇祀鄉

賢子四撫辰撫極別有傳

蕭友蘭字九畹昇之曾孫性孝友萬厯中嶽薦授江西萬年訓導遷陝西延長教諭興學勸士周給貧乏延長人德之卒於任士民哭送者百餘人署中有大樹不知其名蘭常憇其下遂名曰蕭公樹

於倫字大常萬厯辛丑進士授吏部主事累遷至通政使以不附魏忠賢告歸璫敗以原官起不赴卒祀鄉賢子斯行字爾翼舉人載忠義傳

曹光德字大洪萬厯辛丑進士授嘉興推官政稱清簡泣任三年以憂去所攜惟圖書而已詳嘉興名宦志平生

黃岡縣志

卷之九

宦蹟

二十二

究心經籍是時江西鄧元錫力排心學嘗著五經繹光德爲之叅訂焉後官山東道監察御史祀鄉賢

鄭之良字直夫萬厯癸卯舉人累官叙州府同知時烏蒙安邦彥爲亂川西南半陷督撫朱燮元屬之良監軍之良乘賊觴壽日攻其壘擒賊將四十餘人殺傷無算遷鎮遠知府復征苗有功時往來蜀道其子屬以道死埋巫峽者十餘人之良曰但能平賊身膏野草分也故所向輒有功晉按察副使歸卒子一魯一愚一浚能世其

家

杜應芳字懷鶴祖鳴陽父傑皆有傳應芳至孝有異才稱

於士林萬曆丁未進士授禮部主事出守河間時福藩之國河間屬邑例有夫馬供億者五萬金應芳議其太繁節三萬後三王皆視爲例天津稅璫馬堂橫肆應芳得其弟不法事捕治之堂坐此遂去督學四川無敢以片牘干者詳四川名宦志遷福建按察使時倭寇旁午應芳勦撫兼用海甸以寧後告歸卒妻樊氏死難載列女傳子鎮銜俱選貢

程之試字考錫爲諸生以行誼文章著萬曆己酉舉人教諭扶溝擢江西都昌知縣抗直忤上官降四川按察司檢校川撫重其才司夔州稅課剔除蠹弊民商便之補

河南考城知縣累遷開封府同知所至多惠政治河有勞績河有妖羣像祀之之試縲而投於水事遂已後以親老乞歸養鄉人稱其德

鄒之易字心元少家貧負薪水供母萬曆庚戌進士授銅梁知縣恤民艱剔宿弊徵解錢糧不取羨餘府吏收兌者皆憚之及去有存積三千金謀諸邑紳士置義倉廣儲積安奢之叛城賴以全

甄淑字爾儀萬曆庚戌進士授陽武知縣改太康俱有異政入侍經筵爲吏科給事疏請額丁額米兩衡其數丁隨米收額不減而貧民罔病熹宗從之他奏疏多救時

事是時楊漣被逮淑疏救激切及阮大鍼囑傅櫬劾魏大中左光斗諸人淑復疏辯其冤忤魏璫削籍事見明史後起戶科都給事中遷太常少卿累官南北刑部尙書

五欽濂字孟周博學多聞萬厯壬子舉人授南陵知縣首開六連湖水利澤及數千戶時寇躡江南捐俸賑饑練鄉勇增城堞賊不敢窺撫按以守禦功疏薦第一尋卒於官祀鄉賢子承祜癸酉副榜有詩名承啓辛耶舉人孫懋德懋才俱進士官知縣懋德別有傳

李五美字尊菴萬厯壬子舉人教諭輝縣累遷戶部郎以

黃岡縣志

卷之九

宦蹟

二十四

清節著出知台州府改欽州時山寇刼掠民多逋賦五美設營分戍解散之賦因以登上官胥徒過州擾民者亟懲之修復子城濬濠築堤葺學宮蒐志乘文物煥然狼賊趙永烈據河州五美畫策堵禦兩省才之會惠州有海警題授惠州海防載廣東名宦志

滿思謙字吉用世職衛指揮使博學深思習於經籍中三科武舉累遷四川建武遊擊以征苗有功擢廣東掌印都指揮使子如弦善騎射矢無虛發由武舉累官楊州水師參將長孫世榮以廕官領運著績

王六如字凡夫萬厯戊午舉人授信豐知縣時寇盜蜂起

兵役數發富戶輸役無不破產者六如請於上照糧編派黠者不得規避往倉庫典守外簽里民六如釐正之責歸庫吏邑人立祠以祀詳江西名宦志

祝世美字濟之萬曆己未進士授諸城知縣有異政改東阿值白蓮賊亂後招流亡課農桑三年報最行取吏科左右給事遷兵科都給事疏劾張應昌殺良冒功人咸稱之晉太常寺少卿以守城功加秩正卿親老歸養遂終焉

晏清字泰徵萬曆己未進士授蕪湖知縣廉介明允改吳江百姓請留吳吏來迎爭於路不得行再宿然後去詳

黃岡縣志

卷之九

宦蹟

二十五

太平名宦志吳江值水澇爲民請命得邀全荒例改折擢吏部稽勲郎時魏忠賢方盛請封其從子良臣爲伯清阻之不得行冢宰周應秋怒遂削職崇禎初起文選郎尋給假歸壬午起考功郎轉廣東鹽法道卒於鬱林子霽明與其五孫俱亡子婦樊氏以櫬歸葬霽明字雲章有文學才名重一時

倪敏政字楸績世職衛指揮使以轉漕功累遷靖州守備禁止令行苗民率服撫按交薦擢福建都指揮使進表入京詔試兵部遷浙江南洋遊擊平海寇劉香老有功加授南洋參將子宏祚世其爵領運有績

李應鶴字鳴臯世職衛正千戶言動不苟以轉漕功署指揮同知又署本衛指揮使理屯局有稱庚戌歲饑出穀數百石以賑年八十卒子遐齡貢生祀鄉賢

程良球天啓辛酉舉人由建陽教授累莒州知州改渾源州申革草商除民大害以憂去任士民懷之詳山西名宦志家居戶族貧者分田與之復按季給鹽戶必周其敦睦如此所著有周易贅餘

廖自強字中立父珩才敏學博與修郡志自強由歲薦授江油知縣縣有荒糧萬餘白強泣言於大吏疏請得盡蠲邑人尸祝不衰

黃岡縣志

卷之九

宦蹟

二十六

何閔中字綱卿性敏捷目十行下天啓壬戌進士授鎮江府推官累遷四川提學副使素饒才學復善甄別所得皆知名士載四川名宦志改雲南瀾滄兵備道捍患禦災功績甚著時避亂婦女數千人賴以生全卒於洱海士民戴之祀雲南名宦平生德量寬和不問家產時稱蘧宿先生子昌祚見孝友傳

靖科元字若谷天啓壬戌進士授邯鄲知縣興水利鋤姦弭盜民懷其惠改宜陽擢刑部主事進工部郎中以簽京商事忤時相周延儒罷歸御史衛景瑗疏救不得時流賊蹂躪築砦小崎山保聚鄉族遭土寇襲破之殉焉

子三人乃心廩生乃試貢生俱從死小崎乃獻官豐潤知縣

劉宗祥字梧陽祖珙父功允皆有傳宗祥天啓乙丑進士授金壇知縣正直不避權貴奸猾斂迹時海盜王武烈爲亂宗祥捕得之餘黨憤起人皆危懼宗祥悉平之拜監察御史崇禎初巡按江西條陳興利除害數事稱旨繼按四川入覲面劾少宰張捷行私捷坐免時侯良柱秦良玉討平□□賞格不行宗祥上其狀始錄前功事見明史進太僕少卿管東路遷江西巡撫致仕

王源昌字紹貽天啓乙丑進士授禮部主事出知恒陽府

黃岡縣志

卷之九

宦蹟

二十七

時中使監軍威權日肆源昌抗不爲禮以清直聞後擢監察御史巡按江西值宗室驕恣悉持法裁抑不少貸改鎮河南禹州時八年不登源昌蠲賑招集全活甚衆流寇陷洛陽將窺禹源昌飭練鄉兵防禦周密禹卒無患遷汴梁觀察使去士民遮道哭送者百餘里未幾乞終養歸年九十卒詳河南名宦志子樹仁世其學行魏公韓字小韓父翊明博洽端方公韓質魯而好學事祖母以孝聞天啓乙丑成進士授太平知縣修復伯翳祠墓募築城垣已寇至督鄉兵禦之斬獲無算累遷汝南大名薊永諸道興士愛民弭盜却敵多異政所至皆崇

祀名宦時內監魏忠賢張彝憲聞其名欲致之公韓慊慨負氣節不稍屈崇禎初推巡撫保定以母老乞歸隱居樟松湖築室曰漁臺年八十餘卒

陶起虞字士熙事繼母以孝聞操行端潔嗜讀書天啓乙丑成進士授江西進賢知縣改太和縣政簡刑清除其積弊士民樂之家無擔石儲鄉評推爲清介云

王用予字安生崇禎戊辰進士授淮安推官屢白枉獄修文起書院勤課士值歲荒捐賑篋橐俱盡全活流民以萬計淮苦水爲築三壩新舊兩城皆無患詳江南名宦

志六年報最時方多故詔儒臣必習吏事擇知府推官

黃岡縣志

卷之九

宦蹟

二十八

治行卓異者入翰林於是擢用予爲檢討子澤宏見文苑傳弟用世字名可事親孝日常依左右英年舉於鄉早卒其子澤霖亦以孝聞官瀘溪教諭有聲

鄭抱素由官生知廉州公平慈惠政簡刑清修廉州志重建富民橋以利往來士民愛戴之載廉州名宦志按廣東職

官志載抱素黃岡舉人又廣東名宦志作官生

官撫極字建之太常卿應震次子以拔貢再任貴陽通判駐畢烏有捍衛功畢烏人立廟祀於關嶺關嶺者撫極所守以扼安酋處也晉平越知府苗帥藍二率萬人圍城七晝夜撫極力禦之以壯士七十人夜襲賊營擒藍

二餘散去以功擢太僕卿致仕歸

程廸由歲貢通判梧州以廉潔稱御史中丞知其貧且廉欲有贈恐不受委以犒軍故贏其數使受之廸曰子孫賢不須此否則益之疾矣聞者歎服

易士龍字雲間崇禎庚午舉人授醴陵諭葺考亭書院明正學尙德行遷大昌知縣流寇來攻者再皆力禦却之門者俘三十餘人以間諜論且云前此皆以是得紀錄士龍訊知其陷賊也盡釋之改宿松歸年八十四卒子爲泰別有傳

牛若麟字鶴沙崇禎丁丑進士知吳縣饑民蜂起若麟亟

黃岡縣志

卷之九

宦蹟

二十九

爲賑卹乃治其亂魁變遂定載江南名宦志

陶紹侃字惜之尙義有勇畧天啓丁卯武舉擢異等授鄖撫游擊會漢中亂陝撫檄徵援勦署爲前部倍道疾馳至三條嶺大雪敵未備突騎乘之斬獲無算事聞擢鄖陽行都司尋加前軍都督僉事值房竹寇亂力戰紅坪灣渡泥關諸隘以軍功遷臨鞏總兵左軍都督告歸卒於家

萬日吉字允康與兄諸生介眉齊名崇禎庚辰成進士授崑山知縣時流氛熾熾江以南人心驚亂日吉撫輯遺黎繕兵守禦羽檄旁午慷慨誓死邑賴以安未幾以憂

去生平著述散佚比卒同里王一翥杜濬悼之

嚴師範字大亦工文辭崇禎辛未進士兵部郎中累官河南布政使司所至盡心奉法皆稱廉明稍有俸餘悉捐施橋梁津渡起河南巡撫未赴卒

閩朝

汪燭南字涵夫明末癸酉舉人順治二年授吳縣知縣分校秋闈稱得人張九徵繆彤皆出其門累官河南知府所至有聲其宰貴溪披荆榛招流亡時崗搗山賊數千人爲患燭南示以威信親入險招撫賊首周飛雄其衆盡降溪民德之卒年五十二工詩文著有天鏡堂遺稿

黃岡縣志

卷之九

宦蹟

三十

子基邦貢生基美舉人官教諭

韋克振字子寅父石麟前明戶部郎督臨清倉以廉潔稱克振雄才博學明末判杭州順治二年授寧波知府捐俸賑饑招集流亡所活數千人年七十九卒於官子成賢別有傳

陳瑾字公瑜明末甲戌進士授行人遷吏部郎以清介聞順治初薦起儀曹尋督學八閩汲引孤寒權貴不敢干以私暇與諸生論文講道著有性書或問資善錄諸書及歸行李蕭然詳福建名宦志子際昌貢生際鼎蔚州知州孫應鳳保康訓導俱克世其家

陳克峻字伯鳴順治初由拔貢授虹縣知縣有清名歲旱設法賑救全活萬衆以艱歸課子著書不與外事年八十卒子敏常康熙癸卯舉人

詹謹之字仲庸明末丙子舉人順治初授濟南推官釐清宿弊力卻鹽引及嶽廟各陋規訊讞務得實情全活甚衆尋以疾歸杜門著述卒祀鄉賢從子大有以舉人知金谿縣嚴介自持不避權貴一時誣挾者屏息崇儒尙禮谿人思之祀鄉賢

晏濟明末舉人順治初授鳳陽推官平反者衆他郡疑獄不決者悉就理焉爲守所忌尋罷歸年八十二卒

黃岡縣志

卷之九

宦蹟

三十一

張楨才能治劇順治二年授蘄水縣丞值山寇竊發官兵進勦軍需旁午楨委曲籌畫民以無擾載蘄水名宦志韋成賢字念莪順治丙戌進士選庶吉士丁亥分校禮闈得人最盛遷侍讀出爲江南參政督理糧儲滌除宿弊賦足而民不擾遷右通政以丁父艱哀毀卒

操志葵字我忠順治三年由例貢任浙江蘭谿縣丞勦白頭賊有功補授蘭谿知縣愛民減賦有惠聲操守清潔人無敢私謁者歸居正直尙義鄉里稱之

凌建奇字仲平順治戊子舉人積學實踐丰采嶷然曹本榮劉子壯師資之授翰林院孔目奉

命冊封安南宣布威烈比歸

世祖嘉之

賜象骨扇及

上方克食康熙初齋

詔陝西旋典試山東未竣事卒於官

程啓朱字念伊博物治聞有經濟才順治己丑進士知神木縣以最擢刑曹出知衛輝府招集流亡撫以慈惠在任十八年晉山西鹽運副使衛人思之二年卒於官詩載百名家選子奕契樊俱有聲奕字禹甸由保山知縣擢西安同知居官以廉靜稱

黃岡縣志

卷之九

宦蹟

三十二

穆修由歲貢官鉅鹿知縣舊志稱其有惠政民愛慕之陳士銘字大新爲諸生時豪雋好談兵精天文及山川阨塞順治六年以鄖陽守備勦流寇餘黨身經百餘戰未嘗挫衄賊平擢軍功累遷總兵官鎮守寶慶督餉福建卒於官

王躬允字爾極順治己丑歲貢隨大軍赴粵授澄海知縣下車訪疾苦問利弊潔己愛民大姓陳退夫集萬人壁鷗汀以自保有楊許者素劫掠先歸命搆鷗汀鷗汀懼不敢降躬允得其情單騎往壁人望見之曰王使君來我數萬人活矣乃出迎事得解鷗汀爲建祠像祀焉城

隅有叢爲崇居民皆徙避躬允以文榜其宅崇遂滅三載治行稱最解綬歸課子讀書不倦卒年八十有六李君柱順治七年從征入粵知新安縣潔己奉公勤心撫字值營兵肆暴守將故縱之君柱力爭不得投劾去上官廉得其實治縱兵者罪民感君柱之力詳廣州名宦

志

孫錫蕃字斐臣少工詩文由選貢司訓公安勤講課舉優劣修學宮爲學根極理要一宗紫陽課士十則皆以躬行實踐爲先士風丕變載公安名宦志遷遵化知縣改霑化均有清惠聲以疾告歸著有復菴詩文集及易經

黃岡縣志

卷之九

宦蹟

三十三

圖說子寅寓宙孫銓鎬鎰俱諸生有文名鎬字元希孝友端方安貧力學子祚灝祚濬同榜舉人

張之杜順治辛卯舉人有才名授隨州學正獎勵後學士風胥振在官七年遷常德教授去州人思之見隨州名

宦志

黃中實字鼎在順治壬辰進士授吉水知縣省簿書清刑獄民不忍欺盜賊斂息擢行人司告歸安貧自得不入城市

汪煉南字治夫順治壬辰進士選庶吉士授編修值楚省大祲疏請蠲賑辛丑督學順天康熙癸卯庚戌鄉會兩

元皆出所拔考最晉侍讀學士以疾假歸卒

杜碩字芳洲順治甲午舉人榜姓楊性最孝父病兩載未解衣三日始一食及父沒痛不欲生昏而死者再後除廣東博羅知縣償逋欠懲蠹蝕革陋規均田糧士民以忠孝廉明歌之擢最卒於官事載博羅名宦志弟蘅字草臣順治己亥進士授北直平山知縣學極宏博有文稿行世

熊光裕字肅行順治乙未進士任榆次縣課最洵陞杭嚴道修築海塘實資保障

見浙江省志

署按察司越無冤獄悍

兵攘奪移文提督崇飭境內肅然

見李漁資治新書

又以鹽價

黃岡縣志

卷之九

宦蹟

三十四

日騰請提鹽引民被其惠

見浙江省志

以老致仕卒於家

汪嶼南字與山性孝友父世植明末鴨蛋洲之難嶼南守父屍不忍去獻賊至逼入江不溺逆流上舟人拯之順治丁酉舉於鄉授廣西新安知縣縣素有苗患嶼南撫其酋遂不復叛以艱歸民請畱弗許童叟送於分水塘爲清水分流之頌後補武邑清操自任不事干謁值新河邪民爲亂大吏以疲卒五十使往故難之嶼南慷慨赴敵民皆望風降邑屢饑捐粟勸賑全活甚衆及歸築室江洲以老鄉里稱之

葉自巖字魯瞻寄籍武昌順治丁酉舉人授黃岡教諭太

守蘓良嗣重其才令攝縣事聽政無畱牘以明允稱民
逋賦貧不能完者鬻產代償之家以此落改銅鼓衛學
正衛隣苗疆諭以禮讓士風振起擢衡州教授卒於官
從子學貢生有學行官鄖陽訓導

陳肇昌字扶昇順治戊戌進士授寶鷄知縣招徠撫字蠲
除逋賦累遷戶部郎督學廣東時兵燹後士多流亡肇
昌加意招徠甄拔得人所至申條約興學校士習以淳
詳廣東名宦志考最擢僉都御史授順天府尹仕宦四
十餘年篤誠懋績門無私謁卒祀鄉賢生平好汲引人
才凡所薦達後多爲名臣嗜讀書未嘗以倥偬廢命其

黃岡縣志

卷之九

宦蹟

三十五

子從名儒陸隴其遊故其後多以德業顯子六人大鞏
貢生大年大章大羣大華大輦另傳

吳升東字巢薇參政元伯子順治己亥進士授登州推官
時于七叛案連坐大獄升東讞鞠平反甚衆所至愛民
重士風裁侃侃知無不言累官浙江道監察御史復協
理河南道事告歸著有玉磬齋瑞芝堂集

汪士奇字凡子順治己亥進士以孝友方正重於時授南
安推官改東鄉知縣康熙十三年賊兵肆掠士奇練鄉
勇保障孤城大敗之盡追賊所擄男婦數千人而還賊
平乃興學校育人才士民愛戴擢刑部雲南主事年六

十餘卒孫度宏另傳

樊維域字念菴少失父事母張氏以孝聞順治己亥進士教授德安究心理學課士以孝弟廉隅爲本遷平鄉知縣弭盜賑饑凡積弊不便民者悉除之時漳水泛決維域捐貲築堤防開渠漑畝患遂息期年以母老告歸肆力正學著述甚富卒祀鄉賢子齊伊以鄉舉官中書舍人孝友文學鄉評推重

宋必達字其在初寓居武昌值獻賊陷城驅人於江必達夫婦扶父授磯下得片板乘之竟抵陽邏乃免終孝養焉順治辛丑成進士授江西寧都知縣請免清泰懷德

黃岡縣志

卷之九

宦蹟

三十六

二鄉逋賦招集流亡邑有二城民兵分處必達始爲團練法適聞賊張志在阻兵窺贛南圍寧都請援未集必達率鄉勇與營帥協力破走之境賴以安後奉檄誅黨亂者必達抗言良民脅從願身保其無他全活者甚衆及解組歸中途遇賊劫之繫密室中夜半忽多人持兵杖大呼宋公擁以去蓋寧都百姓也年六十餘卒詳江西名宦志子敏求康熙戊午解元聯捷官檢討有父風以文行稱敏政官訓導孫鎰德化知縣有傳

王追駮字里之尙書廷瞻孫順治庚子舉人除永州教授遷犍爲知縣縣故瘠供膳例派里甲追駮悉捐之興學

勸士文治遂盛擢刑部主事多所平反乞歸途次百餘人焚香跪道左詢之則署廣西司時所釋死囚皆感泣各言其故家居十餘年教子孫清白不問產業子一得諸生孫封渭乾隆壬申進士

鄭昱字方南父先慶有傳昱康熙庚戌進士知建陽縣改唐縣以廉能擢工科給事有正直聲出爲江西糧道革除陋規數萬請免弁丁月銀興學校釋諸生冤獄甚衆晉廣西按察使持法平允詳江西廣西名宦志遷安徽布政蒞官月餘宿弊一清尋以老乞歸讀書教子鄉人以爲模楷子可格舉人官中書歸養工詩文著有永懷

黃岡縣志

卷之九

宦蹟

三十七

詩菊園集

梁鈇康熙初爲長安縣丞攝縣事農民盧某方耕其婦饁之食已噴血死前官治婦罪且成獄矣鈇至訊其由遂往饁所有樹翳其上伐之中盡蝎也乃知蝎所毒遂白其冤士民咸頌之

鄭繼啓姓洪成童時躑捷走城堞瞥如飛鳥用長矛如雪練無敢禦者康熙壬子舉武科提督趙良棟奇其才從征吳逆平湖南袁州渡鐵鎖橋先登擢軍功累官副總兵年三十八卒於官

王風采字汝載康熙己未進士授會稽知縣清介自矢以

謙讓化民嚴絕請託大嵐山界連金寧温台四郡有白頭賊乘歲饑誘民爲亂風采廉得其魁置於法餘黨解散乃勸賑全活甚衆捐俸建范陽聞居民利之在官十一年邑稱大治詳紹興名宦志祀鄉賢子泮仁諸生澎仁訓導沐仁教諭

萬爲隨字靡瞻里春子慷慨有父風郡守于成龍平東山賊以爲練長資謀畧焉由歲貢官桂陽州學正時兵燹後學圯爲隨捐俸倡修之進諸生勉以忠孝大義人才特盛桂隣苗舊多侵畧與州牧李某往擒其魁餘悉定州賴以安事載桂陽州志弟奇英字省次少孤事母孝

黃岡縣志

卷之九

宦蹟

三十八

與兄友愛無閒家計無所校年八十餘猶矍鑠勤於學以明經官訓導卒

孫筠字湘有父文燦諸生饒才畧明季結寨淋山河保障鄉里爲獻賊所得欲屈以官拒之賊斷其臂終不屈筠康熙己酉舉於鄉授夏縣知縣有循良聲雍正間夏縣樊大元知黃岡訪其子鉞曰吾邑賢令後也善視之其令人久而不忘如此

王懋德字一士父承啓舉人少孤事母孝好學有文名懋德康熙壬戌進士知廣靈縣縣故瘠貧值荒後招徠生聚力陳流離狀悉如其請壬申陝西饑時大臣督運擇

賢能八員佐之懋德分運千餘石由口外黃河故道備
經險阻一年報竣艱歸後補寧都歲饑請發倉捐賑民
賴全活所至振拔孤寒興學勵俗治績稱盛弟懋才字
國士同榜進士新建知縣治事嚴肅人感其厚好汲引
多成名儒擢最以疾歸

謝加恩字勗菴康熙丁卯舉人知四川安縣時土荒民少
加恩招徠經畫民得樂業乃建廟學教育生徒鄰邑皆
負笈至在治八載布衣蔬食素履蕭然以最擢主事載

綿州名宦志

陳大年字子山肇昌長子康熙庚午順天副榜授山西徐

黃岡縣志

卷之九

宦蹟

三十九

溝令邑當燕晉孔道會

聖祖親征噶爾旦餼糧芻茭車輛之屬取辦俄頃年四出雁門
關馳驅無後期值歲洊饑民多轉徙力請於上開倉以
賑徐得保聚無恙艱歸起浙江樂清令建修堤閘及塘
埭各數十處報墾田五十餘畝學宮舊毀於兵燹年修
復如制浙撫王度昭撰文紀之勒諸石遷鄧州牧鄧溝
洫堙廢旱澇爲災年教民修渠歲獲屢登又勸以植桑
養蠶繅功日盛鄧人戴之年七十七卒於家子師履甲
午舉人灝壬午舉人

陳大羣字季超肇昌子康熙庚午舉於鄉知四川會理州

州故邛夔地民俗悍獷大羣至輕徭役抑豪強擇子弟之秀者親爲訓迪士風一變九年考最擢戶部員外旋進郎中咸能舉其職引年歸以禮法教鄉族咸矜式焉子師洛雍正丙午舉人有學行

萬爲恪字敬儒爾昌子康熙丁丑成進士授遂安知縣釐剔宿弊常終日危坐堂上令吏卒無事則散民得自前言疾苦聽斷無畱牘遂故瘠里中歲約出三千金供官曰幫費至是悉革之茹蔬衣布與民休息撫軍趙申喬張泰交推治行第一洪邨水暴溢壞民畜田廬比賑而後請吏爭以故事待報否且得罪不聽遂賑之已如請

並豁其賦用刑務寬恕然法行豪貴不少貸巨盜毛六謙劉念那爲害招至開諭之盜泣感遂爲良民後二十
年子紳祖經其隣境擔夫皆邑人不受值以遺愛猶尸祝云平生嚴重寡言笑雖沍寒盛暑不改儀度然亦無峭激之行饘粥屢缺未嘗言貧也子六紳祖另傳綏祖舉人力學工文有知人鑒誘進後學多所成就與伯兄繼祖以好義稱鄉里服其訓數十年無雀角者

范基祚字叔文先世休寧人祖元達來黃岡因家焉基祚少孤家貧母田氏苦節撫之見列女志基祚力學敦行奉母以孝聞康熙丁丑成進士授河南洧川知縣清操

自矢案無畱牘在治九年以最擢吏部主事將去洧民攀轅不得行擔酒焚香走擁村落父老多泣下者尋以疾歸年六十餘卒子元灝康熙辛卯舉人官固始溫縣知縣以告歸里孫朝綱乾隆辛未進士授資陽知縣候補主事

王一導字子引康熙丁丑進士授德化知縣地瘠多訟一導汰浮費案無畱滯以明慎著艱歸起知屯畱縣值歲耗撫循調恤全活甚衆地易馬牛估權號活稅悉弛之擢吏部主事雍正時累遷四司郎中

御書得雨詩一章賜之釐蠹剔弊有正直聲典試浙江稱得人

黃岡縣志

卷之九

宦蹟

四十一

授浙江寧紹台道兼理海關懲豪飭賑窮乏通商惠民以疾乞歸卒爲人誠直無驕矜之色以孝友世其家子封岱字東垣雍正癸卯舉人以養母不赴選顏其堂曰志養母年九十餘乃卒遂不復仕

余珽字用南少爲諸生與兄世宗齊名康熙庚辰成進士授四會知縣始至有胥獻金者懲之賂頓絕地瀕海經亂丁耗田多蕪請以丁隨糧更募墾給牛種生齒乃殖邑苦盜用其魁治之盜遂止立義學爲之程式人從其教焉七年以病告民籲畱又二年乃歸子宏仁陵水知縣多惠政

王漢周字晉侯康熙癸未進士授奉節知縣有廉明聲擢最累官西臺庫部郎復出守鞏昌諸大吏稔其才凡隣郡重獄委決無虛日多所平反陝人德之以疾卒於官惟敝衣一簔見者嘆息詳四川名宦志

王全才字仲默康熙丙戌進士授廣東長寧知縣縣居叢山中嵐重泉毒又俗尙巫惑衆全才置諸法毀其祠像巫風息盜魁吳辛龍嘯聚久爲民害乃率土兵傾其巢辛龍伏法境賴以安卒於任兄漢準準子楸懷俱諸生有學行楸蘓乾隆辛酉舉人歸州學正

陳大輦字子京肇昌子也康熙丙戌進士授廣西永安知

州地僻俗雜猺獞大輦爲立法使嫁娶喪葬以禮民苗冤輒面控革仇殺之習興學勸士文教遂盛改西隆扁牙盧酋與桑氏素相攻擊至是獲之威震苗蠻復按泗城岑酋平其獄舊俗官至輒多護衛苗長進酒食必先嘗防鳩蠱也乃悉弛衛飲食無所疑岑酋益驚服考最擢福建鹽運司鹺政大治攝視福汀諸郡羣盜脅息發倉賑饑數折疑獄全活甚衆擢台灣道時兵後歲荒大輦分路給粥日食數千人發倉糧分十廠減糶民氣復盛又載米濟臺西小島曰澎湖活者萬家於是議建城郭裁番社花紅搜山陋規番社子弟皆興學又以前此

官莊丈額不實多雜民田及荒埔磽确不可成賦者悉請更定及馬料塘舖皆有議報可卒於官臺民遠近皆至人持香一束哭堦下及去夾岸奔送呼聲雷動子師豫舉人別有傳

王楸績字乃言父漢澳早卒家赤貧母余氏年二十一苦節育之楸績勤學好古康熙乙未成進士除永州教授爲嶽麓山長子光珮己未進士累官通渭登封知縣攝視偃師性廉介爲治嚴明士民稱之擢最卒於官

靖乃成字我思由貢生除漢川訓導遷宿遷知縣地瀕河崩淤無常民隨淤任種以供正賦前令加派民苦重征乃成力請奏免圈柳地民產也軍丁冒占構訟不休乃成廉得其實悉復本業宿民頌之

馮馗字臣武少孤母方氏教之載列女傳馗力學能文負氣饒勇畧遊於黔寄大定籍補諸生例得與武試不售遂效力行間授貴陽把總雍正四年從勦定廣之長寨苗力戰破谷隆關叙軍功一等擢黎平守備駐古州復帥偏師勦撫新疆五載以軍功晉平遠都司遷上江遊擊迎養克孝其弟旭貢生有文名子子式另有傳方子式初第時馗亦以事同來故鄉人以爲美談其後子孫仍家於黃

胡天健字行旃父正君好施與周鄉族貧乏里有疫徧給棺木助以葬資家以是破然終無悔天健性坦易由己酉拔貢累官江右瀘溪安仁鉛山知縣興學校均賦役舉廢出滯所至有聲安仁縣志載雍正十年逆民黃申冠猖獗天健往勦獲其首所至安堵人稱其德

宋鏗字雪懷由貢生授肥鄉知縣清慎自矢邑舊城爲漳水所圯甫下車捐俸修之又建

文廟修補諸缺遺凡民間詞訟及徵納皆令自赴無差拘之擾嚴夜禁弭盜賊懲遊蕩民悉便之

周嵩字元峰祖之彬貢生于清端成龍爲郡守時推重之

黃岡縣志

卷之九

宦蹟

四十四

以儒林俠骨顏其室父大伸諸生守禮方嚴爲鄉里所宗嵩性孝友勵節操博綜羣籍文名特著雍正癸卯成進士授大名知縣釐革蠹弊屢決疑獄洩李茂堤水患居民稱便一時推爲廉幹攝視長垣有重囚病取保沒於家違例削職於是衆民哀號乞畱巡按御史莫禮博李徽奏其事

特旨畱任復攝元城魏縣獄多平反興賢勤學廣置學田士風大振十年擢大理評事將去民猶濟濟日候於門有控者皆曰願得一言而決其得民心如此受評事職三月卒櫬歸過故治民哭而祭者絡繹載道家無私橐舊

時官俸所餘置祀田公諸兄弟鄉人稱之

萬禮祖字履素父爲境諸生性嚴正通經術卒祀鄉賢禮祖雍正癸卯進士知安徽太平縣縣故砦窳多逋賦下車問民疾苦捐貲貸民賴以蘓其無知抵冒者頌繫寬挺之嘗語其掾曰爲父母不克胥匡以生而使謂浚我以生吾不忍爲也遐邇皆稱有古良吏風解組乏不自存民醵錢贈行拒不受家居三十八年親見五代卒年九十有一

王掄士字以三拔貢博通典故由教習任江西豫寧令剔奸鋤猾興學右文政績最著值邑大祲爲粥以賑凡五

黃岡縣志

卷之九

宦蹟

四十五

閱月咸得全活士民立有生祠三比卒囊橐蕭然櫬歸之日送者哭泣入江右名宦所著有問津書院志續三楚文獻錄寧國府志永安州志漳平縣志諸書

謝鼎字匡山鄖陽籍歲貢官蘄水訓導誠篤好士貧無力者捐俸助之多所成就告歸士爲立去思碑見蘄水縣

志

馮子式字汝瞻少穎異隨從父馘任黔以黔籍舉乾隆戊午鄉試壬戌成進士改籍歷知湖南永順麻陽益陽三縣剔弊除蠹所至有聲令永時委勘邊界有獄案七久莫決子式至讞悉得情民服焉麻地遠多蕪招誘開闢

糧日以積士陋少書籍爲廣購寘並給貲以鈔設義學
日親講授文風丕振轉益陽置義渡便民恤老哺孤益
人號慈母然性亢直無阿附間以事忤上官畧不爲動
後調任卒於京邸時論惜之

龍可旌號鶴臯順治辛丑進士先官山東濟陽勤於吏治
聽斷明敏鋤強懲猾吏畏民懷初在讞局決各縣疑獄
數十起又獲逃人四十有奇開釋株連者多至數百人
濟郡舊例秋糧輸之官至春僅給以正令民解赴水次
往返千餘里賠累多至破產可旌廉其弊捐耗免解邑
人立碑頌焉再任中州汜縣亦如在濟時以憂去官年

黃岡縣志

卷之九

宦蹟

四十六

六十卒於京邸

劉公琰字君任庠生則寧子早歲失恃著有哀哀草二卷
事父及繼母以孝聞順治五年選拔授浙江景寧知縣
甫下車問民疾苦興利除害政簡刑清丁父艱景民歌
曰三年勤撫字惠愛洽輿情公今舍我去誰其嗣厥聲
服口選廣西來賓縣縣爲獐獠雜處地亦以治景者治
之民徭咸服旋以終繼母養乞歸民徭攀轅遮道餞送
出境子宗漢諸生宗向以孝行著稱

汪依仁雍正甲辰舉人知山東海陽縣清介自矢門無私
謁聽訟不尚刑威而明斷悉當歲饑請於上游開倉以

賑不繼捐廉勸輸擇公正紳士任之不假胥吏手活數萬人海陽有生祠祀焉

萬廷望字東表乾隆丙辰舉人任陝西定邊知縣先是城治流沙沮洳雨水輒溢入城深三四尺廷望開渠導出城右患遂息又營兵以庸調不支縛副將譟甚廷望徒步往軍士皆辟易廷望曉諭之而止越七年調米脂以終養歸家居三十載卒年八十

萬年豐字武溪乾隆丙辰舉人嗜學工詩候銓知縣借補浙江石堰場鹽課大使在任凡一切鹽筴利病詳悉無遺或涉訟立爲剖析民皆便之又奉檄丈勘沿海各縣

黃岡縣志

卷之九

官蹟

四十七

圩田夫馬供給外饋遺一無所受以清冊實數具報陋規積弊爲之一清歸後笥中惟端溪石數枚無他物也年七十五卒曾孫裕鵬道光癸卯舉人

萬綿祖字莊孫父爲恪別有傳綿祖以雍正乙卯副榜登乾隆丙辰賢書授東湖教諭創修學宮齋舍常召諸生講論文藝士風爲之一變東湖志頗殘缺縣令林有席浼其修輯綿祖釐訂條例斐然可觀著有石徑樵吟二卷述莊文集三卷

郭維本字有如質直力學弱冠舉乾隆戊午鄉試第一其七世祖慶王文成高弟也維本循家法以正心誠意自

勵時因親老兄弟俱早卒不赴選晚任公安教諭遷山東萊州鹽大使前官率以禁私售獲利維本曰瘠人肥己吾不爲也卒於官櫬不得歸民爭賻之著有道菴詩文集

李長青號松村幼卽慕學家貧常佐父耕里師李芳者深於經術青時詣其塾請業遇講書日則往聽朝晡服耒遇課文日則晨往請題於田間成腹稿晚歸呈師如是者十餘年精通書易春秋傳爲文雋傑沉雄乾隆辛酉舉於鄉戊辰成進士歷官寶山知縣蘇松二府同知所至愛士育才政平訟理洵擢同州知府卒於官其去寶

黃岡縣志

卷之九

宦蹟

四十八

山也有典商感訟伸故餽以葎却之曰事後受餽何異事前得贓其任蘇丞筦錢局也有銅商餽以金却之曰無事受餽有事吾豈汝徇由蘇移陝時舟子意公裝必重去鎮船土旣復反之相與竊笑座師陳兆崙聞之貽書嘆美其清儉如此平生篤親念故報李師恩亦爲置祭田十畝里人至今稱之嘉慶二十一年陝蘇各舉祀名宦本籍亦以鄉賢舉皆奉

旨允行子鈞簡別有傳

范朝綱字泉如同知元灝子乾隆辛未進士知山東鄒平縣恩威並著邑有大盜聚黨數百人久爲民害朝綱以

兵除之士民大悅晉戶部主事嘗患心疾閱書籍則稍愈至是病數月卒朝綱穎悟敏捷著有儲菴詩文集
邱恩榮字駕六號澳南乾隆辛未進士授萊蕪知縣屢剖疑獄有生員外出其妻誤買盜衣仇家誣證生爲盜主恩榮察其故立釋之鄰邑蝗起飭鄉民預爲捕具蝗入境依法撲之害遂絕調泰安疏治泰山泉源引汶水歸運河民賴其利內陞部郎揀發湖南任岳州府奸人言臨湘礦可開大吏檄勘恩榮力言不可乃止調衡州衡山縣民曠大思破縣誣其仇殺治罪已入秋審恩榮覆勘得實出諸獄後大忠援例入監子孫遊泮曾越千里

造其里墓三次拜泣不輟子四安序貢生安校江西知縣安庠庠生安學候補州吏目孫汝器汝同皆庠生
胡心安字勉茲知縣天健子幼穎悟嗜學乾隆庚午魁鄉舉試令廣西興安地衝役重吏緣爲奸書院廢爲郵舍心安□蠹吏於法計戶均徭別創驛館修葺灘江書院文教聿興大吏閱兵過境騶從苛索氣張甚心安親禦諸門入謁慷慨爲民請命大吏屈戒其下曰勿犯強項令也權象州處脂膏地纖毫不以自潤補興業察知吏多勾結莠民駕訟累良平反無算奸胥屏息後投劾歸舟經興安灘河適有長官過此挽夫多而難進心安以

小舟鷁退於後兩岸耕者詢知爲胡舊令羣釋耒□許
牽舟迅越其前父老衛送爭餉野蔬滿船長官獎嘆久
之歸居陽邏素交日相過從雖饘粥不繼推解無難色
子士琮諸生孫美彥進士現官刑部郎中美彰廩生美
彧序班曾孫霖澍進士現官貴州貴定知縣澐經舉人
淳經庠生

宋廷採字采持敏求曾孫生而穎異年十九成乾隆辛未
進士授河南南召知縣修葺衙署城垣民忘其勞委訊
裕州孀婦疑獄得情具讞賑濟河北水災多所全活調
湖南黔陽擢粵西南寧同知兼署寧明州釐定鹽價民

黃岡縣志

卷之九

宦蹟

五十

利賴焉晉雲南大理知府辦理銅鹽等務大吏優獎以
爲各屬倡兼署蒙化廳捐資建書院勸學右文士風丕
振服官十餘載所至有聲子文燦貢生

杜乘時號蘭圃家貧篤學乾隆壬申舉人歷官內邱武強
任縣威縣宣化知縣所至囹圄空虛士民愛戴去官日
父老焚香遮道臥轍攀轅數日始得出境懸車後子世
棻官藍田尉藍橋藍關輞川其地在焉遂攜眷往遊以
詩文娛老著有梅笑亭詩集卒年八十有六葬西安南
城外小雁塔寺西南里許幼子枚舉人官教諭

萬廷壁號仍軒壽祖子乾隆壬申舉人初授宜都教諭陞

漢陽教授以能擢贛州興國令敝衣羸馬闔者惟一老僕甫莅興有鍾姓叔姪以茶山構訟姪介邑紳袖金私屬竟夕談不敢出曰萬公非利動人復他介進廷壁笑曰若以此金遺官盍遺阿叔其人慙去自是罔敢干以私僧曇亮經語涉悖謬株連甚眾廷壁欲生之不得卒以是去官大吏欲奏留力辭歸以授徒爲業年七十卒士論高之 子希宗號可亭乾隆己酉舉人知湖南武陵縣以廉明著嘗過龍陽有民欲赴水詰故以囊金投宿店館人詭以錢易金愬諸官不能明希宗代訊館人枝梧希宗書銀字於其手置別所給云字滅罪汝再詢

其婦遙呼銀字在否館人連聲諾遂責婦曰爾夫自供矣婦果曰銀在某所寃遂白歷任益陽永定耒陽每去官士民攀送常數百人 孫鼎洋號小岑嘉慶辛未進士事繼母以孝聞視弟友愛篤至令直隸曲陽治行稱最適修學宮有富民吝捐忤其族族因訐告其曖昧事富民私獻三千金求庇臨訊置金案上曰某捐此重金修學豈是不自愛人遂以金付公而直其事擢大興調宛平差務絡繹傾家飲之晉定州牧平反大獄力興學校署遵化均賦輕徭舉廢出滯嘗攝易州牧去任時士人輪餞一老貧儒獨後辭不獲曰公不我飲某不齒矣

笑從之竟以清苦勞勩卒弟鼎源鼎文俱諸生

張京鯉號小還乾隆壬申舉人先任均州學正教士有法庠序中無不欽佩嗣經大憲保題知縣分發江西授上猶知縣適遇歲饑上游申請發帑以災重不能普遍京鯉星夜馳信歸變產助賑設廠煮粥賴以生活者無算而家貲亦以此傾矣乾隆時與修縣志年六十卒於官宦橐蕭然長子朝薰郡庠生以課讀自食次子嘉薰太學生孫湄議叙巡檢候銓卒於京邸葬於黃岡義園謝國詔字鳳銜篤行宗湯曾孫宦蹟加恩從子也幼嗜學兼工詞翰試有司不利援例授福建南安縣丞國詔本

黃岡縣志

卷之九

宦蹟

五十二

儒家子任下僚亦日與邑人士講論文藝有勸孝歌又有無訟說民咸誦之年五十以艱歸不復出書畫自娛乾隆時與修邑乘

宋本敬字賓門如辰孫父早卒依外祖陳恪勤家因隸湘潭籍舉乾隆己卯湖南鄉試第一歷官山西長治陽城知縣通政司經歷廣西慶遠同知鎮安知府清慎廉平始終一節官山西日陽城人爲建生祠立碑頌焉時同寅山左顏某亦以清廉著民間有南宋北顏之稱子廷楓舉人

張鳳鳴號虞溪少有神童之目長尤該博爲鄉邦所推重

乾隆癸酉經魁甲戌明通筮仕邯鄲知縣累升兗州知府常召見行在奏對稱
旨有老於民牧之

諭有紫貂粧緞克食之

賜鳳鳴聰明慈惠所至政聲赫著雖鞅掌勤劬不廢著述有
周易彙參註說數十卷貫穿百家他經史亦多所闡發
旁通兵法陣圖梗概畧見蒲圻張開東詩集子士昱舉
人平和知縣士旦副榜枝江教諭士最貴州按照磨士
昇布經歷

周凝光字映川乾隆庚辰進士授湖南新寧知縣約己化
民不留獄亦無冤獄再遷衡山時出師緬甸辦理軍務
曲當以軍功加級旋以丁憂卒於家

張其洲乾隆庚辰舉人由大挑知山西平利縣性慈惠爲
政寬厚不務苛細民懷其德而胥吏諸弊未能盡除改
官鄖陽課士有法其洲務該博且富藏書惜晚年子天
無能讀之者又有陳鳳藻科名少後亦由舉人官大埔
知縣慈惠一如張而後裔未能世其業故政績闕如均
無可採未免遺憾云

周孔彰字象初乾隆壬午舉人授趙城知縣居官勤約摘
弊除蠹省費恤民公退卽端坐衙齋門丁胥役皆嚴憚

禱雨輒應數年卒於官趙城民有謂其爲該邑城隍者頗著靈異

嚴承夏號橫溪乾隆丙戌進士才思敏果筮仕浙江孝豐縣甫莅任吏進陋規却之立除其名自是蠹猾膠拳三充鄉試同考官得人最盛如陸費墀蔡恭武楊際清皆其選也調定海洋盜爲商民害承夏造船四隻選民壯訓練值大霧躬親執弩獲百餘人悉寘諸法以功擢杭同知卒於官子家駒家萼貢生家騏庠生寅序班

萬廷琯字武臯乾隆癸酉拔貢授四川合江令合故巖邑盜賊盤踞山谷廷琯廉得巨魁劉天明陳方升等置之

黃岡縣志

卷之九

宦蹟

五十四

法境內輯然會

王師征緬甸吏欲苛派編戶廷琯斥之曰資糧屝屨責在縣官禁勿許居五年罷廷琯少孤家貧爲文峭舊似柳州其小楷尤稱絕技云

萬年蘅字穀仲教授縉祖子也壬午與從兄廷翼同舉於鄉以大挑任福建順昌知縣捐廉創建考棚歲不登民食乏年蘅發常平倉以貸存活無算因以勞瘵卒於官沒後家徒壁立不愧廉吏云 弟年華字封三以明經任竹山訓導時竹山教匪滋擾年華之任軍事旁午日與邑人明恥教戰爲禦侮計邑賴無恙手著格言數十

條足爲士林楷模

朱霞遠字宸周幼孤好學而貧世父大年實玉成之乾隆庚寅舉人揀發直隸權清豐有廉明聲旣補臨城民愛畏之會州屬皆歲祲而隆平爲最奉文撥臨城倉粟助賑霞遠請以餘粟賑邑民州不許堅稟發之隨罄廉典衣買補是年沒於官眷歸敝篋蕭然嗣子鈺郡增生操履騶字紫常乾隆庚寅舉人任荆門學正誘教諸生多所成就嘉慶丙辰教匪陷當陽將及荆門履騶與知州張琴勸邑士民葺城垣募鄉勇晝夜防禦賊攻數日不能破會大兵至解圍走隨奉檄查當陽篆送大營騶兼程馳赴比賊偵知追不能及以勤勞卒於官子大承武庠生孫南薰廩生

黃岡縣志

卷之九

宦蹟

五十五

龍澍號肅齋乾隆甲辰進士授山東新泰知縣以內艱歸旋補江西金谿調贛縣所至涖民慈惠贛濱江嘉慶五年寧都蛟水暴漲贛承其下流兩邑男婦漂溺呼救者哭聲不絕澍購船急拯救一人予錢五千其漂溺死及廬舍蕩析者悉爲安置贛州府試守公出委澍衡文士林允服上游耳其名調補南昌案無留牘晉南昌同知革寶泉局陋規甲寅同考癸酉監試尤兢兢遴才焉年七十一卒於官著有詩文集性友愛恬淡家產悉給昆

弟子景棫庠生

陶國幹號芥亭援例任奉天治中攝遼州事民間生子入冊例納銀數錢貧苦之家至有生男不舉者國幹捐廉貸之事與漢鄭產同士民感戴勒碑紀德後累陞貴州安順知府

欽加道銜以終養致仕

汪兆霖字定山由舉人知井陘縣歷安肅大城擢薊州牧安肅畿輔孔道吏派役不均民多逃亡兆霖至遍履鄉村體察苦樂以九等定重輕流民還集大城徭尤重每大差至則集名鄉保長當堂酌其費歲減數千金其餘

黃岡縣志

卷之九

宦蹟

五十六

一切催差催糧皆委保長七載里無叫囂而官民相信無令不行以疾歸子引鴻舉人監利教諭霖弟兆柯字繼良嘉慶辛未進士選東安知縣治行與兄競爽亦以
□乞休至老神明不衰

□□號華巖乾隆癸卯舉人歷知江西分宜峽江等縣事任分宜時有世家某控其胞姪者以卓茂語再三諭之弗聽及鞠審大陳刑具勢將抵姪於法姪股栗無人色某忽號泣曰審若是吾何以對亡弟於地下叩頭求免遂爲伯姪如初在峽江數年培士愛民百廢俱舉以病乞休上游稔其賢堅留之不一卒於官士民泣送

逾境子嶽卽用從九品

靖本詡字芳萍道謨孫性醇謹博學敦行由舉人官大冶教諭訓課不倦文治日興有德教碑遷安陸教授邑人士臨歧戀慕勒碑亦如大冶子厚錡厚鐸諸生孫華璧舉人教習議叙知縣

王如鑿字又溪一導孫中乾隆甲午副榜選長陽教諭訓迪有方嘉慶丙辰長陽距城三百里之朗坪有教匪聚眾滋擾如鑿偵知以告縣令令在猶豫間如鑿乃徑稟上憲旋經張廉訪長庚帶弁兵七百餘人進勦詎嘯聚者眾主客懸殊未能捷獲張因委如鑿同新令分途堵

黃岡縣志

卷之九

宦蹟

五十七

禦如鑿駐城外十五里之向王廟獨當賊衝誓以死守幼子鏞隨侍在側因諭令回籍鏞曰父殉國子不當殉父乎邑人感動効力城以是免蹂躪嗣積勞成疾逾年卒於向王廟子鴻庠生安貧篤學鵠進士鏞候補鹽知事鵠字霞坡素行端潔嘉慶丁丑進士任石泉知縣鋤奸弭盜民懷其惠調米脂創書院課耕織政簡刑清以艱解官服闋入爲東城兵馬司指揮值歲饑監發粥廠釐剔宿弊胥吏悉憚之任滿選平鄉知縣未兩月移疾卒每去官行李蕭然蓋以清白貽子孫者著有霞坡制藝子森茂監生子岳邑庠生

胡定太字平川生卽膺力過人善騎射工技擊領乾隆癸卯武榜聯捷成進士授侍衛旋授湖南中軍都司以征勦瀘溪縣逆苗升任湖南鎮筵標中營遊擊值苗匪不靖佐鎮帥力戰於觀景由大坡腦等處前後凡七戰屢奏捷音奉

旨記名嘉慶丁巳教匪擾湖北川陝諸省定太隨經畧進兵南漳房縣屬之倒座廟盛家坂等處擒斬計數千隨追賊過陝奉

旨賞戴花翎己未擊賊鳳縣屬之進口關身被數傷仍力戰不退遂擒賊李槐旋又擒賊李潮殲賊首張漢潮等經

黃岡縣志

卷之九

宦蹟

五十八

畧第爲首功聞於

朝五年陞陝西波羅營參將晉廣西義寧協副將其五月帶兵擊五金柱大股賊殲斃龐洪勝生擒龐有兒楊六燕等奉

旨陞授河州鎮總兵在鎮六年整飭戎行修理斥堠嚴捕盜賊兵民且畏且懷丙寅署寧陝鎮總兵會暑雨蒸濕舊傷復發遂引病歸太在軍營與將卒同甘苦而又紀律嚴明賞罰公允故士卒樂爲之用前後經三百餘戰擒殲渠魁近二十名身被石刃勞績屢著蒙

恩賞物件幾難枚舉一時稱爲名將回籍後閉門謝客恂恂

若書生惟以文武藝課子姪爲樂焉卒年六十九子璧
縣丞

靖本託乾隆丙午舉京闈揀選陝西知縣歷署皆有政聲
任興平時白蓮賊入陜鄂去邑數十里上憲檄撤河渡
本託更益舟渡之惟諭不得持兵器脅從者生全無數
旋補邵陽建考棚新文武廟是科鄉試中七人先後成
進士邵蓋六七年無甲榜也歲旱徒步禱雨七十里
外卽日得雨邑人頌之遇歲饑民不知荒邑人建生祠
於署東不能禁以勞卒於官

朱英字一擎乾隆己亥舉人授武昌司訓與諸生講學習

黃岡縣志

卷之九

宦蹟

五十九

禮觀聽肅然捐金倡修諸祠宇及學舍凡二十年武邑
科名較昔爲盛道光甲申以疾歸孫玉廩生

詹玉彬字質齋性剛直家世詩書幼受庭訓尤嫻韜畧玉
彬父故貧兼充營書嘉慶二年川陝匪擾父當從征玉
彬請代大憲許之至營屢獲捷授雲南外委累任陝西
都司逢

覃恩祖父母父母封如其官歷任漢中營及沔縣右營都司
卒於官

王兆京戊午舉人官穀城教諭性恬淡與諸生講論文藝
力宗先輩取予不苟有某生因事株累令欲誣坐以罪

兆京堅持不允其事寢而某生雪庠序中釀金赴明倫額頌者百餘人後引疾歸卒年八十餘

萬鼎琛號璞軒父希嵩邃經學尤工書法乙巳丙午間罄家蓄贍饑者鼎琛成嘉慶壬戌進士以庶常改知曲江縣俗剽悍遇事輒輕生圖累又地多官山聽民阡葬常有將親骸貯鑊罐彼此盜埋殘毀號稱難治鼎琛廉得輕生者坐誣盜埋者坐罪陋風以息旋調始興量移瓊山又獲盜魁歐亞四等數十得卓異以疾卒於任子裕滋舉人孫成錦廩生

汪極三字植齋少孤家貧事大父母及母以孝稱積學寒

黃岡縣志

卷之九

宦蹟

六十

暑不輟嘉慶己巳成進士知河南正陽縣俗强悍賊常出沒山谷極三購擒其渠害漸息又新阜教匪倡亂極三殲之鄰境晏然調鄆城除潔灣河漁舟稅疏濬鴻渠壅塞資助書院膏火士民皆愛戴之卒年五十四子氣濟舉人現官應山訓導

萬鼎欽號抑齋嘉慶丁卯舉人官監利教諭以振興文教爲己任捐廉助修文廟時連年患水凡撫賑諸政與邑令細心籌畫身歷鄉閭勸修堤垸士庶樂從庠序中有因公被誣者俱竭力雪之卒於任遺蠹蕭然子裕海裕淋俱庠生

嚴承啟字德燠與姪垣同舉嘉慶庚午鄉試任巴東教諭
訓課嚴肅易倨而馴變俚而雅先是宜昌府試常在夏
中水漲灘洶士子屢蹈不測道光七年承啟稟請嗣後
府連院試約在水平時學使獎許巴士感頌勒石次子
塢邑增生孫厚錄邑武庠

曾鵬號南池嘉慶辛未進士知廣西陸川縣陸川命案多
株連鵬廉其弊拘首犯定擬餘皆省釋有貢生某與陳
姓爭刈禾某糾眾鎗斃一人鵬破除情面卒寘於法陸
川人咸服其公旋調署宣化以勞瘁卒於官

靖厚欽字阮南道光辛巳解元癸未進士授乎武知縣地

卽古陰平郡羗夷接壤素稱難治厚欽開誠布公民不
忍欺獄訟以息時有兵差過境勒索居民厚欽繩以法
諸將領皆斂戢縣有龍門書院暇則進生童講論經史
評定課藝士風一振解組歸與修邑志將歲事而卒著
有節香堂集子郁恒舉人現任漢陽訓導

胡玉森號鞞階封職宗返孫也幼聰慧弱冠補弟子員次
年卽食餼援例權襄陽教授莅任後逢朔望集多士於
明倫堂諭以敦品勵學每月課文必親自評閱詳加啟
迪襄故冠蓋里旋見消歇自森任後文教日隆科名鵲
起襄人咸推頌焉嘉慶戊寅舉於鄉道光壬辰得明通

榜充

國史館謄錄會一統志成議叙知縣已及選期卒於京邸士
論惜之

曾世儀號鴻階性孝友尤勵士品以副車舉孝廉方正道
光乙未成進士補昌黎知縣勤慎奉公以表彰節義培
植士林爲先務捐廉重修文廟及韓文公祠量移清苑
清苑爲省會首邑儀措理悉當時暎夷不靖復調赴遼
西團練防守擢保定同知署河間知府以勞瘁卒於官
子錫齡直隸候補知縣

李士燮字子烈母姜氏以苦節旌見列女傳道光己丑成

黃岡縣志

卷之九

宦蹟

六十二

進士授廣東四會知縣未抵任需次省垣時大憲廉其
才檄從征獠匪堵捕出力因受瘴成疾回省二月卒大
憲以

聞贈同知銜廕一子入監讀書期滿照四品以下廕知縣例
減等以縣丞註冊

黃岡縣志卷之九終